

Tha iomadh seòrsa cladach an Alba. Tha tràighean brèagha ann a tha a' còrdadh ri luchd-turais. Tha cuideachd machraichean, molan, làthaich, cladaich chreagach agus creagan àrda ann.

Tha muirsgein, srùbain agus luganan a' cladhach sìos don ghainmhich agus tha faoileagan agus eòin grunnachaidh gan ithe. A thuilleadh air an-sin chan eil mòran tarraing ann an tràighean do fhiadhbheatha. Tha an Tràigh Mhòr ann am Barraigh ainmeil airson srùbain agus tha i mòr agus rèidh gu leòr airson làrach phlèan.

'S e làthaich an àrainn cladaich as beartaiche th' ann. Tha seo a' tachairt nuair a choinnicheas an abhainn ris a' mhuir aig beul na h-aibhne. Tha an abhainn a' fàgail gainmheach, eabar agus beathannan a chruinnich i air a slighe an-sin: tha làn na mara dà uair sa là a' fàgail tuilleadh. Tha an t-uabhas de bheathaichean beaga beò anns an làthaich agus tha eòin agus iasg beò orrasan. Chithear ealtainn mòra de dh'eòin grunnachaidh, tunnagan agus faoileagan aig beul a' chuid as motha de dh'aibhneachan.

Saoilidh tu gur e àite-còmhnaidh garbh do bheathaichean is lusan a th' ann an cladach creagach ri droch shìde. Ach tha iad comasach air seasamh ri tuinn mhòra agus stoirmean. Tha lòn a tha follaiseach ris an tràigh air leth math airson sgrùdadh a dhèanamh air fiadhbheatha.

'S e cladaich chreagach a tha cas agus an ìre mhath dìreach a th' ann an creagan mara. Tha feadhainn de na h-aon bheathaichean agus lusan orra ach tha iad sin dìreach rin lorg aig am bonn faisg air a' mhuir. Nas fhaide shuas, air falbh bho na tuinn, tha lusan tìre a' fàs agus tha eòin a' neadachadh. Ach cuimhnichibh gu bheil creagan cunnartach agus bithibh faiceallach.